

Violashon, Insestu, i Aborto

Hopi hende ta haña ku aborto ta piká. Pasobra kada kriatura den barika di su mama ta un pèrsona humano, aborto ta matamentu di un ser humano, kreá den imagen di Dios mes, algu ku Beibel rípitidamente ta kondená (Génesis 9:6; Eksodo 20:13; èts.).

Tòg den kasonan di embaraso indeseá (manera violashon seksual òf insestu), e mésun hendenan ta opiná ku kompashon pa e muhé ta hasi aborto un solushon aseptabel, preferibel...òf asta neseseario.

Ta étiko pa e muhé ku a ser violá abortá e yu indeseá?

E echu ku un mama no ta deseá e beibi, ta dun'é e derechu pa mat'é? Un mama ku ta mata su yu di tres luna no por bin ku e argumento ei dilanti hues. Dikon anto e tin e derechu di kita su bida tres luna PROME ku parto pasobra e ta indeseá? Desde ki tempu **deseo** di un pèrsona ta tuma preferensia riba BIDA di un otro? Klaro, e muhé a sufri un inhustisia trágiko. Ma esei ta husifiká matamentu?

Ta notabel ku den kasonan di violashon, hopi biaha hende ta pensa solamente ku e beibi ta e produkto repulsivo di e violadó repugnante. E konseho outomatiko ta pa ekspulsá e kriatura, lubidando por komplete ku e beibi tambe ta yu di e muhé inosente. Por bisa ku mitar di e beibi a desaroyá for e mama. Si e muhé ta abort'é, e no ta mata un “produkto repulsivo”...**eta mata su propio yu.**

Ademas, aborto pa motibu di violashon ta un inhustisia flagrante. Tantu lei di nos pais komo esun di Dios ta para riba ku **solamente** esun kulpabel di kometé un krimen por ser kastigá pa e delito. Pa kastigá un pèrsona inosente pa e maldat di un otro pèrsona ta e kolmo di inhustisia. Entre otro Beibel ta deklará, “No mata tatanan pa nan yunan; tampoko no mata yunan pa nan tatanan. Kada un mester wòrdu matá pa su mes piká” (Deuteronomio 24:16).

Si un hòmber a kometé un krimen, i hues konsientemente ta laga sera yu di kulpabel na lugá di e tata, nos tur lo ta furioso i lo protestá e inhustisia tan flagrante. Ta interesante ku nos ta dispuesto si pa tolerá presis e mésun inhustisia aki ora ta trata di aborto.

Ora un muhé ta sali na estado pa motibu di violashon, nos ta kastigá esun robes. Ta ken a kometé e krimen: e hòmber òf e beibi? Ta ken a hasi piká, e tata òf e yu? Ta ken ta esun ku ta meresé kastigu: e violadó òf e kriatura? Sin duda ta e hòmber violadó. E beibi ta inosente. Ma kiku nos ta hasi? E violadó ta bai será pa poko tempu...si polis logra pone man riba dje. Ma e beibi inosente, indefenso ta ser kruelmente ehekutá! **Esei ta hustisia?**

Nos ta sinti pa e muhé ku ta víktima di un krimen penoso. Violashon sigur ta un inhustisia horibel kontra e muhé. Tòg nos no mester lubidá ku e beibi tambe ta un víktima. Pa abortá e yuchi inosente tambe ta un inhustisia. Segun mi konteo, 1 inhustisia + 1 inhustisia = 2 inhustisia! **E di dos inhustisia no ta korigí e promé inhustisia!**

Nos a yega di trese dilanti ku vários komplikashon físiko por kompañá aborto. Hopi muhé tambe tin problema sikológiko òf spiritual, sintiendo kulpabilidad pasobra nan a mata nan propio yu. Maske lo no ta fásil, e muhé ku NO ta abortá e yu indeseá sikiera lo evitá e trouma di mata su propio yu.

E mésun argumentonan ta aplikabel den kaso di insestu. Den kasonan ku por ehèmpel un tata òf tio ta tene relashon seksual ku un yu òf subrina, tin bes e mucha muhé ta hopi yòng ora e ta sali na estado. Algun ta konseh'é pa abortá pasobra e no ta basta grandi pa duna lus. Ma médikonan en general ta bisa, si e mucha muhé ta basta grandi pa sali na estado, e ta basta grandi pa duna lus. Aborto por okashoná mas trouma i herida emoshonal i físiko pa e mucha muhé.

Dios todopoderoso por prevení konsepsion den kasonan di violashon i insesto. Ma si E ta pèmití e muhé di sali na estado, E tin un proposito pa e yuchi ei, maske e proposito por ta desconosí pa hende. Dios ta bisa di e profeta Jeremias, “Promé ku Mi a formábo den barika, Mi tabata konosébo, i promé ku bo a nase, Mi a konsagrábo...” (Jeremias 1:5). Ningun beibi ta un aksidente. Kada un ta stimá di Dios i tin un proposito spesífiko. Maske kon penoso, aborto no ta e solushon den kasonan di violashon i insestu.